

13. august 2010  
14. april 2009

EM 2010/32  
UPA 2010/47

**Qimmit uumasogatigiit erseqqinnerusumik suussusersillugit avatangiisinut navianartorsiortitsisinnaasut nalilerneqarsinnaasut eqqunneqarnissaannut kinguaassioartinneqarnissaannullu kiisalu qimmeqatigiit tamakku qimminik allanik kinguaassioqatigiinnissaannut inerteqqusiinissamat Naalakkersuisut suliniuteqaqqullugit peqquneqarnissaannut aalajangiinissamat siunnersuut.**

(Demokraatit sinnerlugit Inatsisartunut ilaasortaq Justus Hansen)

### **Akissuteqaat**

(Inuussutissarsiornermut Aatsitassanullu Naalakkersuisoq)

### **Siullermeerneqarnera**

Qimmit uumasogatigiit aalajangersimasut erseqqinnerusumik suussusersillugit eqqunneqarnissaannut kinguaassioartinneqarnissaannullu kiisalu qimmit tamakku qimminik allanik kinguaassioqatigiinnissaannut inerteqqusiinissaq pillugu Naalakkersuisut suliniuteqaqqullugit peqquneqarnissaat pillugu Demokraatit sinnerlugit Inatsisartunut ilaasortaq Justus Hansen aalajangiiffigisassatut siunnersuuteqarpoq.

Inatsisartunut ilaasortap taassuma § 36 malillugu apeqquteqaataanut 2009-mi augustip qeqqani akineqartumut siunnersuut assingulluinnarpoq. Taamani apeqquteqarpoq Kalaallit Nunaani meeqqat qimminut unammisittakkanik aamma nukittuunik taaneqartartunut illersorniarlugit Naalakkersuisut qanoq iliuuseqarniarnersut.

Taamani akissuteqarpunga danskit naalakkersuisui sammisami tassani inatsimmik nutaamik aalajangiinissaat piviusunngortitsinissaallu Naalakkersuisut utaqqimaarusukkaat. Danskit naalakkersuisuisa oqallisissiaat maanna pissarsiarineqarsinnaalereerpoq, apriilip qiteqqunnerani siullermeerneqarsimalluni, inatsisissatullu allannguutissap atuutlernissaa 1. juli 2010-mi pissasoq naatsorsuutigineqarluni.

Siunnersuut aqcutigalugu qimmeqatigiit immikkut taaneqartut 13-init pigineqarnissaat kinguaassioartinneqarnissaallu kiisalu qimmit tamakku qimminik allanik kinguaassioqateqarnissaat inerteqqutigineqassaaq.

Taamaattorli ikaarsaariarfissamat aaqqiissuteqassaaq, taamaalilluni inatsisissatut siunnersuutip saqqummiunneqarnerata nalaani inuit qimminik taamaattunik inerteqquteqarnermut ilaasunik pigisaqartut suli pigiinnarallarsinnaagaat. Qimmilli tamakku tunineqaqqusaanatillu tunniuteqqusaanngillat, sumiiffinnilu tamat orniguttarfiiniitillugit pituutaqartinneqartuartaasatut kiisalu isumannaatsumik ersaruteqartinneqartassatut.

Taamattaq inuit inatsisissatut siunnersuutip saqqummiunneqarnerata nalaani qimminik inerteqqusiinernut ilaasunik kinguaassioartinneqarnik aallartitsisimasut taamaatitsiartuaarnissaannut aaqqiiffigineqassapput. Taamaatitsiartuaarnissamat aaqqiissut tassani siunnersuutigineqartoq naliliilluarneq malillugu Kalaallit Nunaanni atuutilersinnaanngilaq.

Tamakku saniatigut qimmit tamarmik tamat ornittagaaniitillugit pituutaqartinneqarnissaannut pisussaaffimmik siunnersuut aamma imaqarpoq, tamannalu Kalaallit Nunaanni aamma atuutereerluni, kiisalu qimmit tamarmik ilisarnaasersorneqarnissaannut nalunaarsorneqarnissaannullu pisussaaffik qaammatinik sisamanik ukioqarnerannit qaammatinut marlunnut ukioqarnerannut nuunneqarpoq.

Dansk it inatsisissatut siunnersuutaannut oqaaseqaatini malugissallugu pingaaruteqarpoq, Qimmit pillugit inatsisinik atortitsinermit ministereqarfiup Ataatsimiititaliaani amerlanerussuteqartut, qimmit uumasogatigiit assigiinngitsut inerteqqutigineqarnissaannut piviusunngortitsinissaq pillugu INASSUTEQANNGIMMATA.

Tamatumani tunngavigineqarpoq qimmeqatigiit aalajangersimasut qimminit allanit navianarnerunerusutut toqqassallugit kisitsisitigut tunngavissaqanngimmat, kiisalu qimmeqatigiit inerteqqutigineqalerneranni qimmit ulorianaatillit pillugit ajornartorsiut malunnaatilimmik annikillinissaa qulakkeerneqarsinnaanani.

Taamattaq ataatsimiititaliaami amerlanerussuteqartut isumaqarput, qimmimik inerteqqutaasumik pigisaqarneraalluni politiit isummernerat innuttaasut assortorniarlugu ajornakusoortittussaammassuk, taamallu qimmeqatigiinnik taamaattunik inerteqqusiinermi qimmit pitsaasumik uumasuusut eqqorneqassammata.

Inatsisissatut siunnersuut ima oqaasertalersorneqarsimavoq, qimmeq qimmeqatigiinnut inerteqqusiinermut ilaasunut imaluunniit taakkunannga kinguaassiortitsinikkut kingoqqisunut ilaanersut qularutigineqarsinnaalluni, tamatumalu illuatungilernissaanut uppernarsaatinik saqqummiussinissaq piginnittuusup pisussaaffigalugu.

Oqaatigineqassaaq taama isumaqarlutik amerlanerussuteqartut makkununga sinniisoqarfeqarmata; Dansk Kennel Klub, Danmarks Civile Hundeførerforening, Dyrenes Beskyttelse, Dyreværnsrådet kiisalu Den Danske Dyrælægeforening-imit sinniisit.

Qimmeqatigiit inerteqqutigineqarnissaannut taaneqartutut siunnersuutigineqarput Uumasut nakorsa qarfanit paasissutissat malillugit Kalaallit Nunaanni pigineqarnerat killeqartorujussuuvoq.

Taamaakkaluortoq aalajangiiffigisassatut siunnersuut Naalakkersuisut ilalerpaaat, naatsorsuutigaaralu qimmit qimuttut kiisalu qimmiuteqarneq qitsuuteqarnerlu pillugit Inatsisartut inatsisaannut atuuttumut nr. 18, 30. oktober 1998-imeersumut allannguutissatut siunnersuut ukiaanerani ataatsimiinnissamut piareersimassallutigu.